



Atassutip Inatsisartunut ilaasortaaitai
Inatsisartut Allattoqarfiat
Maani

Puisit amiisa akikillineqarnerat pillugu Naalakkersuisunut apeqqut pillugu

Inatsisartut Suleriaasianni § 36, imm. 1 naapertorlugu 8. december 2006-imi ima apeqquteqarpsi:

Puisit amiisa akiisa apparnerisigut nunatsinni piniarnermik inuussutissarsiuqartut eqqornerlunneqarnerat pinngitsoortinniarlugu Naalakkersuisut qanoq iliuseqarnissamik pilersaaruteqarpat?

Tamatumunnga atatillugu ilisimatitsissutigineqassaaq inuussutissarsiuqartut piniartut ukiut tunisinermut tapiissutit nunguffigisaasa naanerini eqqornerlunneqartannginnissaat anguniarlugu tapiissutit naapertuunnerusumik aqunneqarnissaat pillugu Naalakkersuisut Great Greenland A/S-imi oqaloqatiginnilereemata.

Ukiuni kingullerni tallimani ameerutit marloriaatingajannorsimanerat Naalakkersuisut erseqqissassavaat, tamatumanilu piniartunut akeqartitsinerup akuersaarneqarsinnaasumik annertussuseqartiinnarnissaa Great Greenland A/S-imit (GG) unaminartorujussuusimavoq. 2002-mi ameerutit 61.484-iusimapput 2002-mi 118.000-inngorsimallutik. Taamaattumik Aalisarnermut, Piniarnermut Nunalerinermullu Pisortaqaqarfiup GG aamma KNAPK peqatigalugit 2006-imi ammit tapiissutitalerlugit tunineqarsinnaasut 100.000-inngortippaat. Tunisinermut tapiissutit ukioq naallugu agguataarneqarnissaasa qularnaarneqarnissaa tamatumani siunertarpiaasimavoq. Akerlianik tunisat 100.000-init ikinnerussappata Naalakkersuisut tunisinermut tapiissutinik iluarsiinissamut periarfissaqarput, tapiissutit tamarmiusut inuussutissarsiuqartut piniartunut tutsinneqarnissaat qularnaarniarlugu.

Ameerutit qasserpiaanissaat eqqoriarneqarsinnaanngilluinnarpoq, pingaartumik sila sikoqassusialu piniartut puisinniarnissamut periarfissaqarnerannut apeqqutaalluinnarmata. Taamatuttaaq tunisineq pinngortitap pissusii pissutigalugit ukioq naallugu assigjiaaginarnaq ajorpoq, ass. aataaqatigiippassuit aatsaat ukiakkut Nunatta kitaata sineriaata annersaanut siammartarmata. Tamanna silagitsillugu sikullu akornutaatinnagit piffissami aggustimit novembarimut tunisat amerlerujussuarnerannik nassataqarsinnaavoq. Tamatuma illuatungaanik natsertat


21. december 2006
J.nr. 01.28/70.71.01

Postboks 269
3900 Nuuk
Oq/tel +299 34 50 00
Fax +299 32 47 04
apnp@gh.gl
www.nanoq.gl

ukioq naallugu assigiiaartumik amerlassuseqartarput taamaalillunilu taakkuninga tunisineq aamma assigiiaartumik agguataarsimasarluni. Taamaakkaluatorli oqaatigineqartariaqarpoq puisinniartuunermi qaammammiit qaammammut isertitaqassuseq assigiinngiiaarujussuarsinnaasoq. GG-mik oqaloqateqarnerit aallartinneqarsimasut inuussutissarsiutigalugu piniartunut, pingaartumik ukiup qaammataani kingullerni tunisinermut tapiissutit nunguffigissagunagaanni aalajaannerusumik isertitaqartitsinissamik qularnaareqataanissaat neriuutigineqarpoq.

Ataani titartakkami 2006-imi ukiup qaammataani siullerni aqqanilinni ameerutit agguataarneqarnerat takutinneqarpoq. Tassuuna takuneqarsinnaavoq tunisineq taamalu isertitaqartarneq qaammammiit qaammammut allanngorartorujussuusartut.

2006-imi ameerutit qaammatinut agguataarlugit



Naggasiutigalugu tunisinermut tapiissutit GG-p KNAPK-llu 2006-imi marsip naanerani akit pillugit isumaqatigeereernerisa kingorna aatsaat inuussutissarsiutigalugu piniartunut tunniunneqarsimanerannik oqaatigisarsi Naalackersuisut iluarsissuteqarfigerusuppaat, tamanna ilumuunngimmat. 2006-imi januaarip ulluisa arfermanniilli GG inuussutissarsiutigalugu piniartunut tunisinermut tapiissutinik tunniussisalerpoq, akuersaarneqarsinnaasunik akilerneqarnissaat qularnaarniarlugu. Taamaaliornikkut GG-p KNAPK-llu akit pillugit isumaqatigiinniarnersa nalaanni inuussutissarsiutigalugu piniartut "eqqorneqarnissaat" pinngitsoortinneqarpoq.

Ikinngutinnerusumik inuulluaqqusillunga

Finn Karlsen

Aalisarnermut, Piniarnermut Nunalerinermullu Naalakkersuisoq